




Taburan hujan kurang hingga 60 peratus

» Fenomena El Nino kategori kuat landa negara bermula bulan ini

Oleh Norakmah Mat Youb dan Mohd Iskandar Ibrahim
bhnews@bh.com.my

► Kuala Lumpur

Taburan hujan di seluruh negara dijangka berkurangan antara 20 hingga 60 peratus bermula bulan ini,

INFO

Ukuran tahap kekuatan El Nino

Anomali suhu air permukaan laut	Kategori El Nino
0.5° - 1.0° C	Lemah
1.0° C - 1.5° C	Sederhana
Melebihi 1.5° C	Kuat

berikutan fenomena El Nino kategori kuat yang sedang melanda Malaysia.

Suhu tertinggi

Ketua Pengarah Jabatan Meteorologi, Datuk Che Gayah Ismail, berkata fenomena pe-

manasan suhu permukaan laut yang berlaku dalam tempoh enam bulan setiap dua hingga empat tahun di timur Lautan Pasifik menyebabkan suhu negara dijangka meningkat antara 0.5 hingga dua darjah Celcius.

Beliau berkata, cuaca panas itu akan berterusan sehingga April dengan negeri di utara Semenanjung sudah mula menerima kesan akibat fenomena terbabit.

"Kesan El Nino akan dirasakan di seluruh Semenanjung, Sabah dan Miri serta Limbang, Sarawak pada hujung bulan ini.

"Suhu tertinggi yang pernah dicatat akibat fenomena El Nino ialah 40.1 darjah Celcius pada tahun 1998 dan tidak menolak kemungkinan situasi sama bakal berulang kali ini," katanya ketika dihubungi BH, semalam.

Kesan besar

Che Gayah bagaimanapun berkata, suhu akibat fenomena El Nino yang melanda negara dijangka berada pada tahap tertinggi bulan ini dan berkurangan mulai bulan depan, seterusnya bertukar normal menjelang Jun ini.

Fenomena El Nino menyebabkan rantaian perubahan iklim berlaku di seluruh dunia dan antara kesannya ialah hujan lebat di sesetengah kawasan, manakala kemarau panjang di kawasan lain.

Malah, Pertubuhan Bangsa-Bangsa Bersatu (PBB) pada Disember tahun lalu mengeluarkan kenyataan menyatakan fenomena El Nino yang melanda seluruh dunia bermula sederhana dan setempat di Pasifik, bagaimanapun meningkat sehingga ke rantau Asia.

Fenomena itu mendatangkan kesan besar seperti di tengah dan selatan India, tengah dan timur laut Thailand, tengah dan selatan Filipina, utara Kemboja, timur Indonesia, Papua New Guinea dan kebanyakan negara di kepulauan Pasifik.